

四庫全書

史部

欽定四庫全書

欽定平定臺灣紀畧卷四十七

十二月初四日丁酉孫士毅奏言聞福康安從鹿仔港親身統兵進剿於十月初七八行抵元長庄殺賊無數賊匪大敗四處潰逃福康安仍即統兵前進同海叅贊一齊打進諸羅城又總兵梁朝桂在鎮平庄攻剿賊匪連獲勝仗脚上受傷各等語如此信果真則將軍福康安等已痛加剿殺直抵諸

羅軍威大振不獨諸羅之圍已解並逆犯林爽丈等自必魄驚膽喪立見掃除奏入報

聞

初八日

辛丑

上命軍機大臣傳諭福康安海蘭察李侍堯徐嗣曾曰前據李侍堯孫士毅等奏福康安海蘭察前抵諸羅縣城諒屬確實福康安或因初到縣城接濟糧餉調度一切未及即時拜摺一二日後自當馳報摺

音今已閱旬日總未據福康安有摺奏到殊不可解  
朕因臺灣剿捕賊匪未即迅速歲事宵旰焦勞福康  
安所深知今既直抵縣城與柴大紀會合福康安自  
應將統兵前進沿途剿殺賊匪及抵縣城後如何佈  
置會兵進剿並如何接濟諸羅被困兵民糧食各情  
形即時詳晰馳奏且孫士駐劄潮州係屬隔省亦經  
具摺奏聞何以福康安自前月初五日在鹿仔港發  
摺後距今一月有餘並未據續有奏報而舒亮帶兵

赴大里杙會同進剿此刻自己得有勝仗亦未據奏  
及即或因海洋風阻臺灣奏摺未能如期遞送內地  
而李侍堯現在蚶江廈門一帶自必得有地方官稟  
報何以亦未據續奏李侍堯在彼不過照料過兵運  
米等事有何忙迫而亦不暇繕摺馳奏耶至梁朝桂  
前在益水港帶兵奮勇曾經賞給巴圖魯名號與賊  
打仗受傷後加恩賞戴花翎伊前在金川軍營屢著勞  
績此次剿捕賊匪又能奮勇出力實為祿營鎮將中

出色之員但前據柴大紀接到梁朝桂咨內以所帶  
征兵不敷攻剿面稟恒瑞於各營盤酌量抽調再行  
前進並稱凡事皆由恒瑞主持事之能行與否不能  
自專等語已降旨令福康安查詢具奏今看梁朝桂  
打仗受傷情形是伊頗能勇往直前身先士卒前此  
稟請恒瑞抽撥官兵攻打前進之語自係急欲援應  
柴大紀而恒瑞不能用彼或竟有心忌梁朝桂先往  
得功故為掣肘之處著再傳諭福康安切實訪查並

詢問梁朝柱及隨營將弁恒瑞有無此等情節據實覆奏

十二日巳李侍堯奏言本月十七日以後總未續得臺灣信息將軍等既無奏摺過境各官亦無稟報連日海洋風汛甚大蚶江廈門兩處俱未有船進口無從詢訪想此時福康安等當已有奏摺在途尚未遞到或已經得手勢有可乘欲竟待大有剋獲一併具奏亦未可定再貴州提兵許世亨帶

領官兵二千已於本月二十二日在蚶江放洋前  
往鹿仔港臣所派本省兵一千往常青處者亦已  
於二十五日在廈門放洋湖南兵現亦陸續入閩  
約計十二月初十日內可抵蚶江沿途夫役俱已  
早為備辦不致有悞俟一到蚶江臣即照料配渡  
奏入

上命軍機大臣傳諭李侍堯曰旬日以來摠未據福康  
安奏到捷音但揆度情形自斷可無意外之慮福康

安海蘭察統兵進剿聲威壯盛所帶巴圖魯侍衛章  
京等俱趨健絕倫一以當百且川省屯練及貴州兵  
屢經徵調最為得力而廣西湖南兵亦俱係生力勁  
旅自可乘銳奮剿其恒瑞普吉保所帶之兵雖駐守  
日久不無氣餒但見有新到勁兵數千壯其聲勢亦  
自當振奮是福康安等抵縣城後自必會合攻剿所  
向克捷即賊匪欲逞其故智於官兵進縣城後復行  
攔截而福康安等亦必預有佈置相機堵禦斷不至

墮其術中計其所發之摺此時諒已在途想因風信所阻未能速達今觀李侍堯之奏風訊甚大亦合朕度量之意惟俟風定福康安奏摺進口即飭沿途星飛馳遞以慰屢切

十三日丙午孫士毅奏言數日以來臣分遣弁員於

各海口上際探訪風聞福康安殺散賊匪之後分兵前進直剿大里杙現在賊衆驚惶已有解散之

勢奏入

上命軍機大臣傳諭福康安海蘭察常青李侍堯孫士毅曰孫士毅所奏情形係得商販傳聞自屬確實想福康安奏報之摺竟因風阻滯未能速達朕於臺灣軍報晝夜縈懷福康安素所深知今既得勝仗與柴大紀會合攻勦即使軍務紛繁亦豈有不速行馳奏以慰朕懷之理看來福康安於抵縣城後曾兵進勦聲勢壯盛賊匪自必紛紛潰散返顧巢穴而舒亮又與徐鼎士於大甲一路進兵夾攻大里杙之背此時

賊勢窮蹙自必聚集一處希圖保護巢穴今大兵四面環攻正可聚而殲擒諒此釜底遊魂斷不能久支時日惟大里杙係屬賊巢間賊人負嵎恃險竭力防護築有城堡剗挖溝濠圍以荊竹以為抵死抗拒之計此時福康安統兵進攻若能即時摧破無須用礮轟擊固屬甚善倘察看情形該處亦與金川之勒烏圍噶喇依相仿官兵攻搥或需時日不若用礮轟摧更為得力此皆福康安經過之事著福康安或將軍

金定日人三言  
卷四十七  
營所帶小礮改鑄大礮施放攻打可期一舉摧破賊巢迅速集事目下已屆年節正迎禧集社之時福康安等務須倍加奮勉尅期蕝事

十四日打福康安海蘭察鄂輝同奏言初六日帶兵起程赴援諸羅途中分起行走防備賊人抄截初七日申刻行抵元長庄於普吉保營前數里安營查閱該鎮所帶官兵內挑選可用者隨行計新舊兵丁共有六千餘名又挑義民千餘名一併帶

往查元長庄以南處處皆賊匪屯聚攔截援兵之路而諸羅日被攻圍危在旦夕援救稍遲必有疎失必須不避艱險深入賊中直抵縣城方能得手即將各兵分為五隊臣福康安與海蘭察鄂輝普爾普穆克登阿普吉保額爾登保及巴圖魯侍衛章京等分隊帶領凡遇賊庄即行勦洗並預為約定各隊互相援應將義民分為兩翼躡探道路村庄如遇賊人抄出即可分投堵截部署已定遂於初

八日寅刻發兵裹帶口糧前進黎明時行抵崙仔頂地方賊匪多人潛於竹園內施放鎗砲一齊擁出我兵屹立不動鎗箭齊發臣福康安海蘭察帶巴圖魯侍衛衝入賊中賊匪抵敵不住退入竹林兩旁竹園蔗田內及崙仔尾等處各庄賊匪或數百人或千餘人蜂擁前來抗拒並從中橫截官兵希圖斷我後路臣已預為布置調遣令鄂輝穆克登阿帶領屯練降番扼住右首東庄溪橋普爾普

侍衛普寧恭將吳宗茂等帶兵堵截左首各庄賊  
衆並遣義民分投焚斫竹園蔗田及各處草莽當  
將崙仔頂庄崙仔尾庄打通維時已交巳刻恐被  
賊人攔阻不能迅抵諸羅臣等一面迎頭勦殺一  
面商令海蘭察酌帶巴圖魯侍衛總兵普吉保及  
奮勇官兵長驅先進臣福康安以沿途賊匪甚多  
必須將各處賊庄盡力攻勦使其奔命不暇海蘭  
察方可直前無阻乘隙遄行隨連攻埤長庄柴林

脚新庄仔西勢潭庄游厝庄三塊庄本廳庄天錫庄灰礮雙漢口上崙庄海豐庄過溝仔庄等處賊無不克捷并將房屋全行燒燬以防賊人散而復聚其庄民耆老持衣出迎及丁壯情愿隨行者分別酌加賞恤以廣招徠而海蘭察等沿途奮勇打仗殺賊所向披靡進至牛稠山地方距諸羅約有六七里賊匪阻溪自固在山梁屯劄山後數里即係圍城竹柵賊見官兵將至四面圍裹不下萬餘

海蘭察帶同巴圖魯侍衛官兵直越漢河衝過賊陣我兵人人思奮東西攻擊無不一以當百搶上山梁攻克竹柵賊匪紛紛逃竄即於酉刻入城臣福康安所帶官兵處處攻戰天色向暮又值雷雨交作本應暫為歇息但兵機最貴神速未便稍有稽遲隨催兵連夜前進復攻克北社尾台斗坑牛稠庄等處賊庄痛殺賊衆城中義民踴躍出迎歡聲震地即帶兵入城撫慰獎賞守城義民頭目接見

矜耆人等宣諭

聖恩仍回牛稠山擇其形勝地方安營駐劄一面出示撫輯派員曉諭良民各安生業城中人被圍已久飢困情形極為可憫現在賊庄所存糧石頗多足資接濟令民人儘數搬運入城現在米價頓減數倍民情歡慶附近一帶並無賊人踪跡初十日臣等出城搜剿賊庄至大崙地方遼恒瑞亦帶兵打通半天厝等庄前來會合鹿仔草等處賊匪業已

全行逃散。此日夜打仗，共計殺死賊匪八百餘名，鎗斃騎馬賊目六名，奪獲賊人鎗砲器械旗幟等物，無算。生擒賊匪七十餘名，訊非賊目，即行正法。伏查賊匪自滋事以來，從未大加懲創。經此次痛勦之後，業已聞風胆落。聞林爽文現已遁往大埔林，或云至斗六門與賊目李七會合。尚未得有確信。臣等現派官兵各處搜庄，不使賊匪潛行誘聚。一俟將村庄搜盡，探明各路賊匪情形，酌派官

兵義民往通諸羅至郡城大路即行相度機宜進  
搗賊巢跟踪追捕且賊巢逼近內山深林密箐尤  
當計出萬全設法堵截以期安速歲事再軍營糧  
餉最關緊要擬給臺灣餉銀五十萬兩鹿仔港餉  
銀五十萬兩淡水餉銀二十萬兩寬為儲備即賊  
匪尅日蕩平亦可留為撫恤難民及修建城池之  
用臣已移咨李侍堯照數撥給迅委妥員解送以  
應急需又十七日夜間聞賊目林棟黃孔等同賊

夥三千餘名在大排竹一帶屯聚查大排竹地方  
距軍營四十餘里為諸羅迤南近山要路並有僻  
徑越過縣城直達斗六門巢穴今賊匪潛匿該處  
與斗六門遙相響應恐不無窺伺縣城之意必須  
先行洗勦大軍北向方無後顧之虞十八日海蘭  
察恒瑞鄂輝帶領巴圖魯侍衛分路前往進攻臣  
福康安督催各隊官兵一同前往甫過馬柵後庄  
即有賊匪若干排列旗幟見我兵將到一齊退據

山梁於遠近竹園內處處施放鎗砲又欲如從前  
誑誘官兵希圖從中抄截臣等探明竹園潛匿之  
賊俱係虛張聲勢令海蘭察恒瑞自山梁進攻臣  
福康安鄂輝帶兵直前衝殺賊匪即行敗竄追至  
大排竹地方該庄係賊匪屯聚之地預恐巴圖魯  
等馳馬衝突將庄外舊有溝壩剗挖寬深各處要  
路俱搭蓋草蓐安設賊卡據死拒守並於溪河下  
流築堤壅水深及馬腹巴圖魯侍衛越溝過溪甚

為勇往即一面決放溪水我兵得以同時並濟將  
賊藜全行焚燬殺死賊匪一百餘名擒挈活賊四  
十三名餘俱四散奔逸上山時已昏暮道路叢雜  
未便窮追即行撤兵回營稍為休息定於二十日  
赴斗六門進勦其諸羅至府城一帶屯聚賊匪前  
派普爾普等由茅港尾進剿十六日遇賊四五千  
人普爾普烏什哈達分為兩路夾攻衝殺賊匪紛  
紛奔潰我兵奮勇直前追趕二十餘里奪獲器械

百餘件殺賊三百餘名擒拏活賊二十四名訊非  
要犯業經正法因天晚即在灣裡溪暫駐十七日  
帶兵沿途搜查村庄民人投出者甚多俱經妥為  
撫慰行抵三坎店地方距府城十餘里知府楊廷  
理遵檄率領義民會合一處道路均已開通現在  
各處匪徒俱已聞風胆落逃竄入山臣等赴斗六  
門後自不敢復至諸羅滋擾但賊人素甚狡黠詭  
計最多亦不可不嚴行防範現在舊存之兵全數

並未撤動令柴大紀在城外西南扼要之地劄營  
蔡攀龍在城駐守相為犄角加意嚴防不可稍涉  
大意以困進兵後路再義民內素悉賊情之人有  
情愿密購賊中黨羽接應官兵擒獻賊首者臣已  
許以重賞令其前往或可生致首逆但所言是否  
確信未必可恃此時惟當整頓兵力奮勇進攻以  
期搗穴擒渠迅速歲事再據鄭國卿稟稱義民首  
廷元等在鹽水港附近樹林頭朴仔脚等處村庄

搜捕餘匪殺賊二十二名擒獲活賊二名業經正  
法等語並將奪獲賊匪鎗砲鉛子繳送前來查鹽  
水港義民何稱出力前派莊廷元招撫村庄數十  
處甚為妥協今復能殺賊奪械亦屬奮勉臣已酌  
加獎賞鼓勵至諸羅一帶地方距山不遠路徑叢  
雜竹林深密賊匪隨處可以藏匿亦隨在可以奔  
逃必須嚴搜餘孽以清後路臣等分帶官兵并熟  
悉路徑之義民首黃奠邦王得祿陳宗器等在賊

人舊時屯聚之地詳加搜捕共搜獲賊匪一百餘名並據義民首千搃藍應舉在水掘頭庄追殺餘匪焚燬草蓐奪獲火葯十二桶攻城大車二輛其餘庄耆鄉民每日擒獻者紛紛不絕臣俱酌加獎賞并將送出賊匪審明正法其並非賊黨為鄉民誤擊之人亦即釋放以杜漳泉民人藉端報復之弊連日以來各庄投出者甚衆即近賊庄等處亦來請示歸庄隨遣義民首陳大用楊梅等招出後

壁苦棟脚等四十五庄妥為安輯以離賊黨現在  
諸羅餘匪漸已搜盡軍營糧餉藥鉛等項派員自  
鹿仔港鹽水港運來均可源源接濟臣等即日帶  
兵往斗六門進剿直搗賊巢其舒亮一路據稱十  
五日前往大肚進剿有賊匪萬餘迎敵我兵過溪  
剿殺鎗砲斃賊數百名牛罵頭義民由大肚山壓  
下襲擊賊後奮勇夾攻賊匪潰敗攻破北大肚南  
大肚王田庄瀨滑庄內灣中灣林仔庄渡船頭莊

仔庄大肚社脚新庄仔鼻山囉嘶庄半山庄坑子  
庄等處十五庄已派兵駐劄北大肚要路即日進  
攻烏日庄等語查舒亮打仗兩次所有派留巴圖  
章京二員及將備官兵義民等均屬奮勇現已酌  
加獎賞容查出力人員再行具奏再查舊駐諸羅  
鹽水港鹿仔草兵丁素非經歷行陣之人又因患  
病傷亡兵力愈形疲乏閩省新兵又復未曾訓練  
可用者更少現於鹽水港等處滿漢官兵內逐加

挑選擇其精壯者隨營聽調並撥交普爾普帶領  
往通郡城大路其諸羅守城兵丁饑困已久打仗  
亦不得力仍全數留於該縣以資防守至郡城現  
存之兵雖未親見然其疲頓餒怯情形大抵與諸  
羅等處存兵不相上下昨接常青扎稱擬帶兵一  
千餘名往剿鳳山賊匪等語竊以南路賊勢雖衰  
出沒仍屬無定常青於行軍之事調遣非其所長  
防守尚為嚴密臣已覆知令其酌量情形倘或稍

不放心毋寧倍加慎重將來大軍進攻大里杙巢穴既傾南路黨羽即可不攻自潰再查逆匪滋事以來到處焚掠庄舍迫脅良民臺灣南北兩路無不被其擾害農民失業甚多情形極為可憫且現在軍聲大振賊黨逃潰其中附和脅從之人紛紛投出亟宜妥為安輯應派專員管理查臺灣各官均有防守城池管理糧餉之責武職官員練事者少俱係帶兵打仗不能紛投差遣臣已咨明李侍

堯酌派閩省同知通判二員知縣四員州同州判  
各二員縣丞四員迅赴軍營專辦撫恤安插各事  
宜並咨會該督照數派撥現任歷練人員如閩省  
候補人員不敷委署應令該督或於浙省通融檄  
調或奏請揀發總期於軍營要務有裨而地方亦  
無貽誤再按察使李永祺自郡城來諸羅由海道  
行走于本月十五日已抵軍營一切撫恤安插事  
宜即令該司總司其事臣仍不時稽察使民人等

均沾寔惠不致稍有浮冒奏入

上命軍機大臣傳諭福康安海蘭察常青柴大紀李侍堯曰官兵自抵縣城後屢戰得勝賊匪聞風胆落已成破竹之勢至賊匪潛匿大排竹地方與斗六門互相應合心存窺向縣城今經福康安等先行剿洗從此大軍進攻斗六門可無後顧之虞所辦甚好而縣城至府城一帶屯聚賊匪亦經福康安派普爾善等由茅港尾進剿遇賊打仗奮勇衝殺賊匪奔潰已抵

三坎店地方距府城不過十餘里知府楊廷理遵檄率領義民會合一處是縣城至府城道路均可開通其舒亮一路亦由大肚進勦攻破賊庄駐劄要路即攻烏日庄看來官兵剿捕賊匪於南北道路要隘已經推廓賊勢日就窮蹙而軍營糧餉火藥鉛彈等項已由鹿仔港等處源源接運又義民等奪獲賊匪火藥甚多並將賊人存貯糧食運入縣城是軍需民食均為充裕現在貴州官兵昨據李侍堯奏於十一月

二十二日已由蚶江放洋自己早抵軍營湖南兵亦於本月初十日內可抵蚶江亦即日可到官兵聲勢更為壯盛福康安等統領進剿乘勝長驅諒此么磨草竊豈能久支時日惟福康安等摺內稱聞林爽文現已遁往大埔林或云至斗六門與賊目李七會合等語逆首林爽文糾衆肆擾狡詐百出今見官軍勢盛跟踪追捕自必急思逃竄若林爽文迴顧巢穴逃入大里杙賊庄則官兵四面環攻正可盡數殲擒其

事轉易辦理惟當防其竄入內山一路至斗六門距海甚近在在道路可通若林爽文窮迫之際或由海道潛逸官兵追捕不無稍需時日福康安等務宜留心防範於進攻時先將通海道路預行堵截船隻皆令其遠岫勿使乘間逃逸搃期將林爽文莊大田等設法生擒解京盡法處治方快朕意耳再前據李侍堯奏賊目李七有歸順之意又私賣糧米接濟嘉義兵民今林爽文欲逃往伊處李七若能乘逆首窮蹙

之時設法擒獻即係有功之人不但可以免罪必當格外加恩賞給官職倘不及時省悟立功自贖將來擒獲林真文後必至一同受戮悔將無及如此示以利害密為開導李七或竟將賊首擒獻更為美事但  
是否即係招諭之李七着福康安訪查確實並將如何辦理之處即行具奏常青此時若能將莊大田擒獲收復鳳山固屬甚善萬一兵力不敷自應倍加慎重相機妥辦固守府城至縣城一帶村庄民人每日

擒獻賊匪其並非賊黨為鄉民誤拏之人福康安於  
審明後即行釋放所辦甚是此等誤拏之人既非賊  
黨審明釋放可以安輯衆心又可以解散賊黨現在  
附近賊庄民人紛紛請示歸庄賊勢日就潰散更無  
難剋期歲事至福康安現在咨調內地官員前赴軍營  
辦理一切撫卹安插事宜李侍堯即派委連令前往  
以資委用再前因恒瑞普吉保二人俱在中途觀望  
節經降旨令福康安查明參奏摠未據福康安奏及

今看伊二人情節普吉保自鹿仔港進兵以後雖未能直抵縣城但究能收復笨港進抵元長庄又自該處移營距縣城不遠特因兵力不敷尚非有心延玩而恒瑞率領多兵駐劄鹽水港一味株守並無寸進現在福康安等已攻透賊圍直達縣城恒瑞不過乘勢帶兵到縣因人成事並非恒瑞自能奮勇前進是恒瑞之罪較普吉保為重著福康安秉公查核據實具奏並將恒瑞於到後隨同打仗能否自知罪戾奮

勉出力抑仍係隨衆行走應遵前旨令其回京之處  
一併秉公據實具奏福康安不可因係親戚稍為瞻  
徇

上又諭內閣曰逆匪林爽文糾集賊黨滋擾嘉義縣城  
圍攻數月經常青等屢次派兵往援俱被賊匪阻截  
柴大紀在城內率領官兵義民悉力保護若援兵再  
遲十日縣城即難固守福康安海蘭察能督率將弁  
官兵鼓勇直進並不俟貴州湖南續調兵丁到齊即

將現有兵民分為五隊派鄂輝等分隊帶領沿途勦殺賊匪俱能奮勇直進不避險阻越過溪河將各處村庄屯聚之賊匪痛加殲殺直抵縣城數月之圍應手而解城內數萬生靈均獲更生之慶並將賊人存貯糧米運入縣城軍糈民食益資充裕此皆福康安等調度有方振作士氣用能克敵致果迅奏捷音自應優加寵錫福康安海蘭察俱現係侯爵著晉封公爵各賞紅寶石帽頂四團龍補掛以示優異其鄂輝

舒亮普爾普等及巴圖魯侍衛章京並在事出力之  
鎮將弁員等俱能率領兵民鼓勇奏績著查明咨部  
一併從優議叙

十五日戊申福康安海蘭察恒瑞鄂輝同奏言諸羅  
賊匪人數衆多從山麓以至海濱大半佔據諸羅  
圍解時官兵奮勇截殺賊匪潰逃連日搜勦自縣  
城迤西至濱海村庄全已收復餘賊多在近山一  
帶潛匿諸羅東門北門外距山甚近即相度地勢

安設營卡俾聲勢互相聯絡並差義民首黃奠邦  
密遣妥人偵探賊踪所至跟踪追剿痛加殲戮使  
賊匪望風畏懼而附和脅從者潛消反側之心不  
敢復行嘯聚賊黨可漸期解散隨商令海蘭察鄂  
輝普爾普六十七帶領巴圖魯人等沿十四甲山  
一路搜查賊庄復令恒瑞帶兵接應臣福康安率  
同巴圖魯侍衛總兵袁國璜督催各隊官兵以備  
往東剿殺行至興化店地方探有賊匪五六千人

在該處屯劄見官兵將至齊出山塹排立旗幟甚  
多臣等將所帶兵分為三隊海蘭察普爾普帶領  
巴圖魯侍衛在前恒瑞鄂輝帶兵及義民首黃奠  
邦等在旁協剿臣福康安帶巴圖魯及屯練降番  
居中調度有騎馬賊目多人執旗往來指揮同賊  
衆一齊自山塹撲下我兵奮勇迎敵用鎗箭立斃  
賊目十餘人海蘭察鄂輝恒瑞普爾普及巴圖魯  
侍衛等一齊衝出賊匪不能抵敵登時潰亂臣福

康安帶領各隊官兵盡力追趕鎗箭如雨殺死賊  
匪五百餘名大砲鳥鎗刀矛旗幟遍地遺棄俱為  
我兵所得情形極為狼狽自興化店至員林等處  
賊庄均已焚燒查從前官兵惟以支持堵禦為事  
即偶得勝仗亦不能乘勝窮追以致賊匪蔓延日  
久散而復聚今連次追尋賊人屯聚處所痛加殲  
戮賊始知官兵勢盛潛逃近山地方招集餘黨據  
守斗六門大埔林菴古坑等處抗拒官兵并恐黨

羽離散將賊眷悉行搬入巢穴以堅其心看來斗六門等處為賊匪險要之地可以東走水沙連北通大里杙若從此窮蹙奔逃歸入巢穴不出逆回死守石峰堡之故智轉可聚而擒戮迅速蕨功是攻勦斗六門一路實為此時要着查南路賊勢漸衰已咨會常青令其固守郡城酌量兵力相機剿撫一面派普爾普烏什哈達酌帶鹽水港舊存之兵前往郡城打通道路并留梁朝桂鄭國卿帶兵

仍駐鹽水港鹿仔草兩處柴大紀仍駐諸羅各處  
戰守機宜均已備惟大軍前赴斗六門之路山  
徑雜出賊庄甚多後路恐有阻截又不能存在留  
兵零星派守惟有探明村僻路徑先行嚴密搜查  
方可長驅徑進至臺灣民人奸良相混驟難區別  
其中附從賊黨者多視官兵強弱以為去就今見  
軍聲振作請示歸庄者紛紛不絕臣恐賊匪冒充  
混入其中乘隙竊發即責成義民有身家者保結

再令歸庄安業其賊中頭目聞亦有悔罪來投之信  
臣密訪與賊目素識之人持示前往諭令設法擒  
獻賊首或帶賊衆來歸許照莊錫舍之例賞給職  
官使其內自相圖亦解散賊黨之一法再臺灣素  
不產馬前經李侍堯預備馬匹俱已解往郡城此  
次巴圖魯侍衛等打仗殺賊往來馳射最為賊匪  
所畏現雖囑其愛惜馬力善為喂養究恐日久漸  
疲無可更換已飛咨常青將厦門解到馬匹交侍

衛果爾敏色於打通道路後即行解送軍營應用  
又據舒亮報稱自鹿仔港帶兵起程初九日行至  
竹脚中藜遶遇田中央大肚溪賊匪數百人前來  
抗拒經官兵殺退奔逃過溪復有溪邊賊匪三千  
餘人抄截舒亮督率官兵分路剿殺鎗斃賊匪百  
餘名餘黨敗竄因該處竹林茂密溪水甚深現擬  
斫竹搭橋前進等因臣查舒亮一路進逼大里杙  
牽綴賊勢今既得有勝仗若能直搗賊巢與徐鼎

士等夾攻固屬甚善但該處山深林密賊匪自諸羅竄逸後迴顧巢穴聚集甚多尤應持重辦理不可稍存大意即日大軍北向聲勢壯盛舒亮乘隙進攻可期得手臣已將進兵機宜行知舒亮令其相機妥辦從前常青自南趨北定於八月十三日起程賊匪聞知四出攻擾官兵不能前進今恒瑞於八月二十二日救援諸羅不能由早路行走情形自屬相仿其由海道至鹽水港時賊匪攻圍盡

夜不息兵力已疲若不顧後路突圍徑進又為魏  
大斌等之續徒損兵力無益於事並恐鹽水港海  
口有失所關非細是以恒瑞不敢輕進及復鹿仔  
草樹林頭後令義民首莊廷元招撫沿海之京林  
等處五十餘庄令義勇自為守禦並撫緝投出之  
樸仔脚等十五庄以清後路原擬勦撫兼施連營  
前進無如過於持重轉涉遲延總由未經軍旅不  
諳機宜尚無有心畏蕙避賊不前情事又蔡攀龍

到諸羅後在西門外劄營彼時兵力已疲祇能防守並無復自諸羅殺出打通道路之事前因郡城消息阻隔知府楊廷理率以傳聞之辭具稟李侍堯即稱諸羅圍解據稟入

告今臣確切查明復傳蔡攀龍面加詰詢因係損失多兵賊圍仍不能解蔡攀龍即據實陳明懇請革職觀其人尚奮勉且籍隸泉州情形亦頗熟悉可否將蔡攀龍酌留海壇鎮總兵原任令其在軍營出

力再革職總兵魏大斌人本平常在臺灣出兵又  
無勞績現在於軍營令其戴罪効力以觀後效至  
諸羅被圍數月終未失陷者實衆民一心奮勉方  
能保守伊等又畧得餉銀接續與昔日希波軍營  
被圍時直斷糧餉之景象迥乎不同柴大紀人本  
詭詐甚染綠營習氣不可倚信是以仍使伊屯駐  
諸羅將來事竣

陞見自難逃

聖明洞見

同日李侍堯徐嗣曾同奏言船戶錢泰來自鹿仔港回至廈門詢稱伊在鹿仔港時聞得福康安於前月十七八兩日攻得斗六門即進攻大里杙先期出示曉諭附近賊巢之人多有來降者大里杙內亦有欲降之人尚被賊攔阻二十四日官兵進攻鎗砲齊放內中願降者知大兵已到即行殺出官兵乘勢追殺內外夾攻已將大里杙打破等語

初三日又有回至蚶江之船戶林任興據稱前月初八九兩日將軍等殺進諸羅柴大紀從諸羅殺出兩下會合道路已通十七八日將軍往攻斗六門有老民帶數百人出來投降十九二十等日又往攻南投社二十一二等日由南投社進攻大里杙又有官兵由牛罵頭一路進攻二十三日兩路兵會合將近賊巢即與賊打仗二十五日攻進大里杙賊衆俱已逃走從前鹿仔港米價每石五千

二百文前月二十七以後頓減每石只賣三千五百文等語查該二船戶所供進兵大里杙情節雖有小異而賊巢已經攻克則大概相同正在繕摺具奏間有福康安奏摺進口查係初十日在嘉義縣所發是嘉義之圍已解該船戶所供已屬符合則初十日以後情形福康安雖尚未有奏摺過境而該船戶所稱攻克大里杙之處自亦必確實可信又有船戶金際泰陳恒裕二船自鹿仔港回厦

稱前月二十四日將軍等攻克大里杙後二十七  
八等日即有大里杙附近庄民運米到鹿仔港來  
賣并有送官穀來交倉者是福康安等攻克大里  
杙賊匪潰散其送穀交倉想係脅從之民懼與賊  
黨同誅特以此自別為良民此皆是極好消息又  
閩省本年錢糧漳泉二府已奉

旨緩徵其餘過兵各州縣雖未據報全完然亦有已經  
徵收者若於本年錢糧內分別蠲緩恐徒滋官吏

侵挪情弊而已完之戶不沾實惠應請於乾隆五  
十三年錢糧內分別

加恩茲據藩司覺羅伍拉納詳稱泉州府之晉江南安  
惠安同安漳州府之龍溪漳浦海澄詔安等八縣  
應付浙粵滿漢官兵及四川湖南貴州各兵兼之  
糧餉軍裝鉛藥等項絡繹過境差務最繁所有錢  
糧應請蠲免十分之三其浦城崇安建陽建安甌  
寧南平古田閩縣侯官福清莆田仙遊等十二縣

所有浙江四川湖南各兵俱由各該縣經過並軍裝餉鞘等項差使亦多實為次繁應請蠲十分之二福鼎霞浦福安寧德羅源連江等六縣應付過浙兵二千名其浙省撥米運裝火藥亦多由此路行走又光澤一縣雖無過兵差使而江西湖廣撥運米石均由該處經過所需竹筏船隻以及灘師繹夫亦有資用民力之處惟此七縣較之漳泉等處差使究屬稍簡所有錢糧毋庸議蠲應請緩至

五十四年麥熟後徵收至屯米一項凡遇普蠲之年例不准免應仍照例完納臣等覆核似屬允當如此辦理則

皇仁既得均沾而按其出力之輕重量為區別亦屬毋濫毋漏又詳稱臺灣府屬應徵錢糧項下尚有本年兵穀一十九萬九百餘石係供支駐臺灣班兵及解運內地營兵口糧又有應徵耗羨庄租雜稅等項計銀六萬九千餘兩粟一千八百餘石係留

臺支銷官員養廉公費之用均應按期徵收以備  
供支第查各處村庄經賊匪蹂躪之後多至流離  
失所現在雖已寧貼而被難歸庄之民搭蔭棲止  
買穀補種其生理尚屬艱難惟鳳山縣南之粵民  
各庄未經賊擾但比戶糾集晝夜堵禦亦甚費貲  
力兼有義民千餘到郡隨征此時猶未遑耕種臺  
灣府屬各廳縣應完正供錢糧已蒙蠲免所有本  
年應徵兵穀及耗羨庄租雜稅等項並請分年帶

徵俾民力益臻寬裕至臺灣班兵口糧請於現在  
解運軍需米內撥出支給其應行解供內地兵糧  
於各倉穀內支給所有官員養廉公費查有司庫  
積存臺灣各年餘租折徵等銀堪以支給等因臣  
等伏思應徵兵穀等項例本不應蠲惟是賊匪滋  
擾以來生民究多拮据懇

聖慈俯將本年兵穀耗羨雜稅等項分作四年帶徵俾  
閭閻更得寬裕均奏入

上命軍機大臣傳諭福康安海蘭察李侍堯等曰本日福康安奏摺係十一月十二日拜發俱在昨日遞到十六十九兩次奏摺以前情形又據李侍堯奏到詢之船戶各情形自當確實看來臺灣勦捕事宜大局已定惟李侍堯摺內稱犬衆逃入山內之語賊匪經官兵屢次殲戮窮蹙奔逃若由海道竄逸官兵乘船追捕轉不免稍需時日如果逃入山內該處俱係生番居住若番衆等畏其偏處竟將賊首擒獻固屬甚

善卽或容其潛匿不肯獻出亦可起官軍全勝之勢  
直入內山分兵搜捕卽將助逆生番一併剿戮亦非  
難事福康安等務須迅速搜捕將賊首設法生擒勿  
令久匿稽誅為要至大里杙所獲之犯自必經福康安  
訊有供詞想此時奏摺業已在途卽日可到再賊匪  
現在勢已換散其黨羽自必紛紛解體今諭令將賊  
首擒獻許以官職使其彼此相圖更可離散賊黨又  
據奏恒瑞帶兵援應途中觀望各情節以恒瑞過於

持重致涉遲延總由不諳機宜辦理不能得手所論甚公至蔡攀龍前此應援入城雖未能帶兵出城剿殺賊目但伊屢次與賊打仗奮勇出力業已加恩擢用提督其過尚可寬免至所有遺失兵丁是否實係陣亡抑係逃散從賊之處必當嚴切查究若隨征兵丁不顧主將臨陣逃散此而不加以懲儆將來何以用兵此內從賊之兵其罪更甚於從賊之民福康安於查辦時尤當嚴加區別從重辦理不可稍存姑息

之見其臺灣應徵本年兵穀耗羨雜稅等項竟皆寬免



欽定平定臺灣紀畧卷四十七

欽定四庫全書

史部

欽定平定臺灣紀畧卷

四十八至  
五十

內閣中書臣沈颺覆勘

武英殿纂修中書臣彭元琬

欽定四庫全書

欽定平定臺灣紀畧卷四十八

十二月十六日

自巳

上諭內閣曰恒瑞在鹽水港一味株守毫無寸進實屬

無能難勝將軍之任著即來京候旨至福州將軍員

缺前曾有旨欲將鄂輝調補因現在保寧已補授伊

犁將軍李世傑仍調補四川總督該省地方緊要且

毗連西藏統轄番夷俱有應辦事件李世傑係屬漢

人且已年老恐辦理公務精神不能周到鄂輝在川有年於該處事宜較為熟諳將來臺灣事竣後仍令仍回成都將軍原任以資駕輕就熟至常青勦捕臺灣逆匪雖未能督率將弁尅期奏績但自駐守郡城以來賊匪屢經攻擾伊已年老尚能臨陣殺賊將郡城保護無虞並節次派撥弁兵援應嘉義調度尚屬有方雖不宜復任總督但伊從前曾任福州將軍熟悉該處情形且以閩浙總督調補該處將來呼應較靈

於辦理一切善後事宜更為得力所有福州將軍員  
缺卽著常青補授將來大功告成後卽留於臺灣帶  
同普吉保辦理善後事宜

同日孫士毅奏言聞將軍福康安於十一月十七  
八日攻得斗六門卽統兵直抵大里杙賊巢先期  
徧加曉諭賊黨聞之畏懼當卽從大里杙紛紛出  
降有被賊攔阻者有攔阻不住被賊戕害者亦有  
竟從大里杙殺出接應官兵者至十一月二十三

四等曰福康安領大兵奮力殺進已將大里杙賊巢攻破奏入

上命軍機大臣傳諭福康安李侍堯孫士毅曰昨據李侍堯奏到官兵攻破大里杙等情與孫士毅所奏大畧相同此信自係確實想福康安等奏報之摺業已在途即日可到現在大兵勦洗賊巢搜捕逆黨想賊首賊目自無難即日就獲成功歲事佇奏捷音朕心甚為欣慰孫士毅自辦理調兵運餉諸務以來俱能

不分畛域實心經理甚屬可嘉俟大功告竣後當賞給世職著先賞戴雙眼花翎以示優眷至昨據福康安奏柴大紀蔡攀龍守城打仗各情形多不確實一節朕因此事反覆思之竟至徹夜不能成寐向來綠營將弁冒功誑報積習原所不免但以天下之大地方事務在在需人任使遇有軍務勢不能祇仗滿洲官兵竟置綠營於不用此次臺灣逆匪滋事以來該處領兵將弁雖俱未能振作有為然就現在該處將領

而論柴大紀蔡攀龍二人尚能奮勇出力柴大紀駐守縣城已經半載經賊百計攻圍時時窺伺柴大紀能督率兵民力為捍衛卒能保護無虞雖伊節次奏報斬獲首級奪取器械等事或間有虛詞詭報此亦綠營積習情事所有但伊困守圍城不辭勞瘁亦當畧其短而取其長柴大紀設果如福康安所云為人詭譎取巧則當縣城被圍緊急之時朕曾經降旨諭令柴大紀如力不能支不妨帶兵出城另圖進取柴

大紀何難委城而出以為脫身之計即縣為賊所据  
百姓為賊所得亦得藉口遵旨而行朕亦難治以棄  
城不守之罪乃柴大紀於奉到前旨後堅持定見竭  
力固守不忍將城內數萬生靈委之於賊是柴大紀  
尚知以國事為重朕閱其奏摺為之墮淚豈福康安  
目擊情形尚不心存憫惻轉事苛求不能以朕之心  
為心乎即如柴大紀前奏賊匪攻城時用大板木車  
中藏鎗砲分路攻犯被官兵砲擊碎枋車一節若果

是虛詞現在福康安奏到進抵縣城時追殺賊匪奪  
獲攻城大車二輛又於興化店地方賊匪經官兵追  
趕大砲鳥鎗遍地遺棄俱為我兵所得等語可見柴  
大紀前奏賊匪大車架砲攻城之處實有其事並非  
虛詞之一証又柴大紀所奏縣城糧食匱乏地爪生  
花俱盡以油粃充食之語雖縣城被圍時義民等尚  
有捐助糧米零星接濟兵民未必遽至盡食油粃但  
當情形緊急之際各路援兵並未即時前進柴大紀

目睹縣城糧食垂盡至以日食油粃為詞希冀援兵  
速到而普吉保恒瑞兩路尚復觀望不進若再實言  
少有糧米則兩路之救援更緩此時縣城之存亡尚  
未可知又安怪柴大紀之過甚其詞耶今幸福康安  
等統兵速進縣城圍解甫獲更生此等措語未實之  
處朕尚加之寬宥寧福康安不為之原諒耶至蔡攀  
龍現據福康安到彼查詢於援應柴大紀時進城後仍  
被賊截斷後路損去多兵未能破解賊圍亦並無自

城內殺出打通道路之事但蔡攀龍屢次打仗殺賊  
曾經常青等保奏頗為奮勇伊帶兵赴援時沿途遇  
賊接仗督兵力戰究能前抵縣城協同守禦是蔡攀  
龍在領兵將弁中尚為奮勉朕已加恩擢授提督福  
康安此時亦可無庸過加責備即云臺灣逆匪等糾  
衆倡亂由於地方文武平日貪索擾累以致激成事  
端朕非不知但該處百姓休養生聚有年即使地方  
官貪黷斂怨亦可據實上控豈可公然叛逆况官吏

騷擾地方剝削百姓自係文職為多至武職所轄不  
過營伍兵丁並不經管地方事務縱使從中婪索然  
較之地方文職所得不過十之一二豈得以此歸咎  
柴大紀蔡攀龍二人此次破賊解圍官兵會合攻勦  
固屬福康安海蘭察督率巴圖魯侍衛等奮勇力戰  
之功該處綠營將弁俱屬懦怯無用但就該處帶兵  
之員而論其中勇怯不齊亦應絜短較長有所區別  
豈可一概抹煞即將來平定之後焉能止留滿洲巴

圖魯百餘人駐守將綠營將弁概行撤回之理看來  
柴大紀蔡攀龍二人未免因俱係提督大員且屢經  
恩旨褒嘉或稍涉自滿在福康安前禮節或有不謹  
致為福康安所憎遂爾直揭其短乎况柴大紀蔡攀  
龍俱現任提督水陸將弁兵丁皆所統轄福康安即  
有不滿伊二人之處然其功究不可泯亦應外示優  
容若遽加之聲色則所屬將弁兵丁見統轄大員全  
無顏面未免心存輕視竟至呼應不靈從而解體於

事大有關係即使伊二人實有緣營習氣不可信任  
福康安何妨俟大功告成到京時密為面奏亦不為  
遲何必於此時遽以此形之奏牘耶朕於柴大紀蔡  
攀龍二人並非先有成見不過念其守城打仗勤苦  
出力曲加軫念福康安非他人可比尤當仰體朕心  
略短取長方得公忠體國之道况柴大紀已加恩封  
以伯爵蔡攀龍業經超擢提督福康安所奏各情節  
並無確據又豈可轉沒其功遽加以無名之罪耶摠

之柴大紀蔡攀龍二人功過自有定論也福康安此時總以坦懷相待不稍露詞色為是

臣等謹案福康安奏柴大紀時未經列款入奏  
我

皇上念柴大紀在嘉義數月積有微勞不肯因未有指  
實之言即行查辦

降旨訓諭至於再三迨後柴大紀貪縱不職廢弛營伍  
種種劣蹟全行敗露始

命福康安李侍堯等查明叅奏具見

皇仁體恤周至惟恐宣勞効力之臣稍為屈抑凡有人  
心者宜何如感激圖報乎

十七日庚戌李侍堯奏言接福康安來咨調取同知

通判知縣雜職等十六員查臺地辦理糧餉等事  
奉派有各省保舉道府人員及本省丞倅等官交  
李永祺委用今賊巢已破一切撫綏安插以及承  
應各項差使自須多員經理臣即遴選妥員如數

派往以資差遣其內地各缺現有分發一等舉人  
可以委署毋庸另請揀發至軍需銀兩除陸續解  
往臺地各軍營一百六十八萬兩外福康安起程  
時雖又委員賚解五十萬兩隨往續又撥解府城  
二十五萬兩鹿仔港二十萬兩但現在用兵正當  
緊要之時所有軍餉自須寬裕備辦始得應手昨  
准福康安咨取一百二十萬兩臣現亦照數撥解惟是前  
後統計共解過臺地三百八十餘萬兩而內地過

兵運餉夫價船價以及製備軍裝發給新募兵餉等項支用亦多雖現在尚未用完將來或有需接濟之處再行酌撥以資預備奏入

上諭內閣曰現在臺灣勦捕逆匪大功即日告竣一切善後事宜需用較多自當寬為儲備以資接濟著戶部於附近鄰省內再酌撥銀二百萬兩令該督撫派員迅速解赴閩省交該督等存貯備用

二十三日

丙辰

福康安海蘭察恒瑞鄂輝同奏言二

十日黎明進勦斗六門約行十餘里有賊匪萬餘分據大埔林中林大埔尾三庄阻截道路該三莊東西相去各數里而賊之剽悍多聚中林我兵會攻一處賊匪必左右抄截互相救應隨商令恒瑞普吉保等進攻大埔林鄂輝袁國璜等進攻大埔尾左右並進海蘭察帶領額爾登保穆克登阿春寧張朝龍及巴圖魯侍衛章京等專攻中林臣福康安帶領巴圖魯章京特爾登轍等及副將張芝

元叅將吳宗茂各員往來督催中林賊匪排列莊外蜂湧前來海蘭察即率領巴圖魯侍衛等直前馳射賊匪鎗砲甚多拚死抗拒我兵倍加奮勇不避鎗砲殺散賊匪攻克中林其大埔林大埔尾兩處賊庄經恒瑞鄂輝等奮勇剿殺同時並潰官兵追殺二十餘里賊匪棄城奔逃不能返顧沿途殺賊六七百名鎗斃騎馬賊目十餘人積屍遍野無暇割取首級將器械馬匹全行奪獲日晡時追至

庵古坑地方該處係賊目蔡福巢穴周圍挖壕立  
柵外釘木板內築土牆防守頗堅臣等帶兵直抵  
柵前見敗逃賊匪紛紛竄入守柵之賊俱露驚惶  
官兵遂乘勢一齊擁進斫殺賊匪不可勝計維時  
天色已暮馬力漸疲本應稍為休息但查斗六門  
距庵古坑三十餘里為適中四達之地得此要隘  
無難直抵賊巢賊匪當屢經挫衄之後心膽已寒  
官兵乘勝疾驅勢在必克隨催兵連夜前進途中

挈獲活賊據供賊人最畏騎馬衝突現於路口開  
挖陷坑密布竹籤希圖抗拒臣以賊匪狡計最多  
不可不防現在稻田收穫泥潦漸乾即繞道由稻  
田行走二十一日齊至斗六門賊匪聚集甚多并  
將附近村莊賊黨撤回抵禦我兵四面進攻用利  
刃長刀斫倒竹圍奪據賊卡轉因其拌死抗拒得  
以痛加殲戮直至午刻後賊匪抵敵不住四散奔  
竄遂將斗六門收復該處為賊人久佔之地居民

皆已從賊除臨陣殺死外村內藏匿者尚有三百餘人業已全數搜出盡行正法連日以來殺賊一千數百名各處村莊震懾軍威扶老挈幼投赴軍前者紛紛不絕西螺民莊番社亦是日投出臣妥為撫輯該村民情愿充當義勇隨同剿賊臣即派署同知黃嘉訓帶領前往將西螺東螺餘匪搜捕淨盡現在中路一帶業已肅清普爾普亦自郡城開通道路事竣北來臣等即日整兵進搗賊巢

擒弔首逆查林爽文自諸羅敗竄後連夜遁回或  
赴水沙連或赴大里杙尚無確信臣等擬由水沙  
連至大里杙一帶山路跟踪追捕並一面行知舒  
亮徐鼎士徐夢麟由烏日莊等處前來會合此次  
巴圖魯侍衛章京滿漢屯土官兵等甚為奮勇出  
力每戰皆勝且臺灣道里遙遠較內地里數不啻加  
倍官兵等晝夜進攻不遑寢食沿途繞道行走涉  
溪過壩並未稍形疲乏看此情形將來一到賊巢

自可尅期奏捷

同日李侍堯奏言據蚶江通判陳惇稟稱將軍於十一月二十五日攻開大里杙後有生番稟說大里杙左右并後邊都藏有賊人官兵在犁頭店地方劄營二十七日官兵進去搜山三十日生番又到營稟稱愿往拏林爽文獻功等語又據船戶紀三回稱在淡水聞說二十五日大兵攻開大里杙賊人都逃入內山國姓埔地方初二日有義民到

淡水云將軍諭令義民各自歸莊耕種如今臺灣  
南北道路都通文報往來無阻北路每米一石賣  
錢二千五百文等語該兵丁船戶等所言雖係得  
自傳聞但前後印証攻破大里杙日期俱屬相同  
而賊已失其所守福康安等乘勝攻剿必能馭用  
生番使賊首不致竄逸均奏入

上命軍機大臣傳諭福康安常青海蘭察李侍堯曰賊  
匪經官兵屢次勦殺勢力窮蹙望風逃竄斗六門既

已攻克逆首林爽文自必逃至水沙連大里杙一帶  
希圖潛匿現在福康安等乘勝勦捕自己跟蹤追獲  
逆首林爽文等想已就擒前據李侍堯孫士毅先後  
奏報已聞有二十五日攻克大里杙之信本日李侍  
堯摺內又有二十七日官兵由犁頭店進去搜山並  
稱三十日生番等到營稟稱愿挈林爽文獻功等語  
其信自屬確實此時福康安等想已將水沙連大里  
杙等處賊莊乘勝攻克但尚未據奏到或係因風阻

滯未能速達現在林爽文究於何日擒獲盼望捷音  
更為殷切賊匪等罪惡貫盈天奪其魄現在大兵四  
路勦捕設逆首林爽文等乘間由海道竄逸則洋面  
遼濶官兵不慣乘船轉致難于跟尋今幸逃入內山  
而官兵等於山路坦途兩俱便易况該處生番又不  
肯將伊容留懇請擒出獻功此正逆首等自投羅網  
定可立就擒縛設使生番等不明順逆私自容留乘  
此全勝兵威直入內山將逆首擒拏亦屬易事普爾

普前經福康安等派往郡城一帶打通道路今業已  
事竣回至北路而府城外賊目陶烏復帶領匪黨自  
行投出懇請効力贖罪本日李侍堯奏亦稱臺灣南  
北道路俱通文報往來無阻北路每米一石賣錢二  
千五百文等語是南北道路業已打通府城一帶賊  
匪聞北路官軍連次克捷賊首業經逃竄自有渙散  
之勢常青此時自當督率將弁將南潭中洲等處賊  
匪勦殺淨盡收復鳳山擒拏賊目莊大田廓清南路

上又諭內閣曰斗六門為南北要隘久經賊匪屯佔福康安統領官兵將中林大埔尾大埔林各莊同時攻潰乘勝疾驅連夜前進勦殺賊匪將斗六門收復官兵奮勇力戰不避鎗砲甚屬可嘉現據李侍堯奏探聞官兵攻破大里杙賊巢賊匪逃入內山生番等稟稱欲將逆首林爽文擒獲獻出等語想福康安等奏報之摺自己在途即日捷音可到俟大功告竣再行另降諭旨外福康安海蘭察鄂輝恒瑞普吉保袁國

璜著先行交部議敘至普爾普現已打通府城道路  
仍回北路協同進剿亦屬出力普爾普著交部議敘  
所有福康安等奏到格外出力之侍衛章京及鎮將  
官弁等除賞給巴圖魯名號及陞等賞翎各員外其  
餘在事出力之侍衛章京鎮將官弁等俱著查明一  
併咨部議敘

二十四日

丁巳

上命軍機大臣傳諭福康安李侍堯曰閱福康安等奏

摺內節經派委鎮將等分路攻勦而柴大紀蔡攀龍  
二人祇令其在嘉義縣防守及招安李七等項細事  
並未派令打仗一次自係福康安於柴大紀蔡攀龍  
二人意存不滿是以不加委任但伊二人如果狡猾  
難信亦必實有劣蹟可據柴大紀力捍圍城已及半  
載細思伊平日居官如果貪殘剝削實有取怨於民之  
處則當縣城被圍緊急時百姓焉肯為之出力死守  
即柴大紀果有貪蹟亦係合郡文武效尤成習未可

歸罪於柴大紀一人而伊保守縣城不辭勞瘁于其  
功豈可盡泯至蔡攀龍援救縣城雖未能殺透賊圍  
打通道路但伊在臺灣將弁中尚為出力能事亦屬  
可用且伊前次不過游擊尚非若柴大紀之職司專  
閩可比自更難肆其貪虐而伊打仗殺賊素為奮勉  
前據孫士毅奏粵省之人亦知蔡攀龍為賊所畏即  
使其才具中平原可核其功罪兩不相掩今福康安  
於伊二人獨不加以委任不獨柴大紀蔡攀龍自覺

無顏即其所轄弁兵見將軍於兩提督大員毫不加  
以詞色恐致呼應不靈殊有關係著傳諭福康安于  
柴大紀蔡攀龍二人仍宜加委用令其自効以勵衆  
心况福康安等督兵打仗屢戰屢捷朕業經懋賞酬  
庸加封公爵四團龍褂寶石帽頂而福康安竟不能  
以朕之心為心於柴大紀蔡攀龍之功概行抹煞耶  
福康安現在遠涉重洋宣勞著績固深為朕所嘉許  
但於此事冒昧陳奏朕不得不加以訓誡福康安惟

當化其成見勿為人言所惑休休有容以期無負任  
使况二武夫亦不值福康安留心偏見也再恒瑞自  
駐劄鹽水港坐擁多兵株守不進並未援應柴大紀  
而轉以賊多兵少率請添調數萬大兵是其畏蕙無  
能實無可解免是以屢經降旨嚴飭並將伊革去將  
軍令福康安查叅具奏今閱福康安奏到之摺不但  
不將伊叅劾且摺內聲敘伊帶兵打仗之處頗似露  
其奮勉此時福康安等統領大兵垂銳深入豈少恒

瑞一人且恒瑞若再不一同前進豈復尚有人心倘  
恒瑞果能奮勉則當福康安未到之先帶兵赴援何  
以並不見其鼓勇寸進今祇係因人成事即有斬獲  
亦何足為功乃福康安於恒瑞頗留地步看來福康  
安于柴大紀等過事吹求而于恒瑞又不免因係親  
戚曲為瞻徇其何以服衆心而示公正耶至臺灣現  
在剿捕事務即日告竣所有該處地方官平日廢弛  
擾累釀成事端之處亦應確切查辦即如永福臺灣

府城協同防守雖有微勞但係道員在彼數年該管地方致有逆匪肆擾伊本不能辭咎其防守府地原屬伊分內之事且賊匪攻擾時有常青在府城督率兵民竭力堵勦永福不過隨同守禦伊身係滿洲於賊匪滋擾之際豈有不幫同常青禦賊而轉委城從賊之理即云逆匪滋事由於府縣激成而府縣等皆係永福所屬平日何以漫無管束以致釀成巨案永福在臺灣道任內有無貪黷劣蹟著李侍堯確切查

訪據實具奏不得姑息即從前被賊戕害各員如孫景燧董啟埏劉亨基長庚湯大奎等雖俱為賊所害但其平日居官實在有何貪縱不職劣蹟以致激變之處亦應仍將其實在款蹟逐加查究孫景燧等皆係永福屬員其在任劣蹟永福自無不知安有任其激成事端置之不問之理李侍堯當嚴加查訪據實  
參奏

上又諭內閣曰此次福康安等統領將弁勦捕臺灣北

路逆匪奮勇打仗所向克捷將賊匪屯佔要隘各處  
先後收復屢著勞績其隨同打仗兵丁奮勇力戰不  
避鎗砲踴躍爭先甚屬出力自應一體加恩賞賚除  
湖南貴州二省派往兵丁雖已配渡尚未前抵該處  
外其四川屯練降番及廣西等省兵丁隨同將領前  
抵諸羅殺散賊匪及攻克斗六門等處均能打仗出  
力自應一併加恩用獎勞動著福康安查明此次隨  
同打仗兵丁其實在出力者每名賞給一月錢糧其

出力稍次者每名賞給半月錢糧以昭鼓勵

二十五日

戊午

上命軍機大臣傳諭福康安李侍堯曰德成自浙江差竣回京召見時偶詢及柴大紀平日居官聲名如何德成在浙有無傳聞據奏風聞柴大紀自復任臺灣總兵以後縱恣自大且居官貪黷較之地方文職尤甚並將臺所轄守兵私令渡回內地貿易牟利駐守之兵所存無幾上年逆匪林爽文等滋事不法其始

不過會匪黨夥聽從附和人數不多因存城之兵無  
幾不能即時搜捕賊匪糾衆肆擾距府城止有三十  
餘里而柴大紀尚不思前往堵禦經永福催令出城  
始與賊打仗又因兵少敗衄以致賊匪益肆猖獗不  
可復制等語果如所奏是柴大紀在總兵任內貪縱  
不職翫法牟利于賊匪起事之初任意玩視使賊匪  
得以鴟張蔓延日久竟由柴大紀貪縱廢弛釀激事  
變其平日劣蹟已屬確有可據浙江既有聲聞福建

自更有議論而福康安前此奏到之摺竟未言及祇含糊其詞實大不是矣柴大紀自駐守嘉義縣城後賊匪屢次攻擾守護無虞經朕降旨設力不能支不妨率衆出城而柴大紀始終固守其功固不可泯但伊于總兵任內似此藐視法紀貽悞地方則其罪亦難諉却朕用人行行政從無適莫之見有功必賞有罪必懲斷不肯稍涉顛預為息事老人福康安到彼後于柴大紀種種劣蹟自必有所見聞即應訪查明確

將其實在款蹟據實叅奏乃僅稱其沾染綠營氣習狡詐難信而于柴大紀平日如何侵貪激變之處並未逐款指出祇含糊具奏豈欲待朕自為揣度耶試思柴大紀係守城有功之人若止憑含糊無據之詞豈能將伊治以無名之罪今朕于召見德成無意中偶然詢及始悉此等情節而德成于朕詢問時初猶以柴大紀屢次邀恩懋賞未肯遽行陳奏經朕再四開導始一一直陳福康安受恩深重非他人可比乃

于柴大紀平日罪狀並未列款入告福康安豈德成之不若耶著傳旨嚴行申飭並著將柴大紀實在款蹟詳悉查明並詢之永福等果否實有前項骫法營私之處即行據實叅奏至李侍堯自調任閩浙駐劄廈門于柴大紀平日居官聲名狼籍及廢弛玩悞之處豈無屬員稟報來往傳聞且德成現在浙江已人言藉藉款蹟多端豈有李侍堯近在本省為總督轉無聞見之理况柴大紀籍隸浙江而其鄉評如此更

非荒唐其事自屬確實李侍堯自應據實劾叅即因  
柴大紀守城有功朕亦自有裁奪乃李侍堯見柴大  
紀經朕屢加恩獎輒思容隱不言殊不知朕于臣下  
功罪從不肯絲毫假借即如李侍堯從前歷任總督  
素能辦事受朕恩眷最優後因在雲貴陝甘任內兩  
次獲咎即將伊按例治罪今於辦理臺灣軍務頗能  
奮勉朕仍疊次加恩可見朕于黜陟予奪一秉至公  
初無成見即李侍堯所身受者而言已可共証今李

侍堯於柴大紀有心瞻顧徇隱實屬辜恩昧良前因  
李侍堯派撥官兵接運糧餉各事宜經理妥速已疊  
次加恩晉錫宮銜賞戴雙眼花翎即日大功告竣本  
欲給還原襲伯爵以示優獎今伊似此心存欺隱看  
來竟係不深知朕之一切秉公賞罰明斷伊無福承  
受朕恩豈可再膺懋賞給還伯爵耶朕臨御以來勵  
精圖治五十二年如一日如福康安李侍堯此等存  
心行事或在朕九旬百歲之時妄思朦混或可今清明

在躬無遠勿矚即歸政以前猶日孜孜不敢寧息豈肯於一切政務稍涉含糊即諸臣中小有過失朕非不曲加寬假至於用人行政以及關係地方吏治軍國大事則是非曲直從來核實辦理賞功罰罪權衡至當安能任臣下之顛預了事耶所有德成指出柴大紀各款及此外有何別項劣蹟並著福康安李侍堯各行嚴查密訪據實叅奏毋得再有瞻徇致干重

咎

上又命軍機大臣傳諭李侍堯琅玕曰前經降旨加封柴大紀伯爵並賞給銀一萬兩令琅玕于浙江庫項內支銀五千兩給伊家屬並諭令李侍堯于閩省藩庫內撥銀五千兩解送柴大紀處給予使用現在另降諭旨訪查柴大紀激變殃民等事所有前項銀兩未便徑行賞給著傳諭李侍堯琅玕接奉此旨將前項銀兩暫停給發另候旨辦理

二十六日已常青奏言近日南路被脅民人聞知

北路大兵痛殲賊匪自當各求生路漸次歸莊今  
查十一月十七十八二十等日尚有賊匪一二千  
在府城小南門大北門外騷擾臣隨派侍衛雅爾  
疆阿翼長官福等帶領弁兵分投迎剿鎗砲斃賊  
甚多又各追趕五六里殺賊十餘名看來俱係脅  
從之徒易于潰散此時賊黨勢孤必將潛逃竄伏  
臣現于府城沿山要隘處加意堵禦其沿海要口  
已有李侍堯派到繒船官弁兵丁在鹿耳門外往

來巡邏臣又派江寧將軍永慶副都統博清額總  
兵陸廷柱輪流前往稽查並據臺灣道永福多備  
小船選派兵役率同廳縣佐雜分路設立水卡該  
道仍不時親往督拿倘有賊匪竄至定可立即擒  
獲必不至有搶奪船隻逃入洋面之事所辦似為  
周密至于東港一口現在有兵駐劄俾商販糧食  
得以往來其有避難歸莊者仍飭地方官隨時撫  
恤再查南路鳳山一帶踞莊抗拒從賊已久之人

未免畏罪不前臣現飭令臺灣道永福凡遠近莊民除前經該道給發腰牌各安生理外再行按莊愷切曉諭概許輸誠復業如果通莊俱係良民以後或有賊黨入莊即令該莊人衆立刻拿解併踪跡莊大田藏匿處所共相擒獻立予重賞其查出負固不服之莊計李侍堯調來內地兵一千名亦將到營臣臨時妥酌前往搜剿至內山一帶前已飭令臺灣縣知縣王露差人賫札往諭番社今再

令該知縣仍遣熟諳番情之人前赴各社諭令擒賊許以獎賞不致逆匪潛逸稽誅奏入

上命軍機大臣傳諭福康安常青李侍堯曰常青奏到之摺尚無取勝消息不過接奉諭旨敷衍塞責亦何顏為此奏耶看來常青一路兵力本覺單弱李侍堯由內地調往之兵亦屬無多又尚未到而府城原有官兵未免師老力疲其氣已餒今賊匪尚在郡城各門分路滋擾常青此時應酌量情形若有機可乘自

當帶兵將附近賊匪悉力搜捕若自揣兵力不敷仍應遵照前旨固守府城現在福康安已攻克斗六門並有攻破大里杙賊巢之信逆首林爽文定可即日就擒其南路賊匪聞北路官軍屢次克捷自必聞風膽落且經常青曉諭各莊民人如遇賊黨入莊即行拿解並踪跡莊大田藏匿處所共相擒獻給予重賞當此賊首潰竄之時其餘黨羽日就解散或其夥匪自謀生路竟將莊大田縛獻亦未可定且逆首林爽文

之次即係莊大田均為渠魁首惡即日福康安拿獲林  
爽文後斷無將莊大田竟置不辦之理自應乘屢勝  
兵威于北路賊匪搜剿淨盡之後前往南路與常青  
會合一處併力勦捕務將賊目莊大田及黨夥各要  
犯悉數拿獲方可謂之蕝事其洋面一帶仍著常青  
嚴飭將弁實力巡緝截其逃竄之路勿令賊人得以  
奪船入海現在常青處兵力不多即未能拿獲莊大  
田朕亦不加之深責若于海口要隘不能督飭將弁

嚴密巡訪實力查緝或致莊大田及他要犯得自由  
海路逃逸令常青自思伊當得何罪耶本日令軍機大  
臣提訊任承恩據供曾聞柴大紀操守平常聲名狼  
籍並不管束兵丁任其遊蕩上年十一月柴大紀巡  
閱各營本應由彰化至淡水等處查閱因聞林爽文  
滋事並不前往查辦轉回至府城後來林爽文攻擾  
府城時聞柴大紀尚在城內經永福催令打仗始帶  
兵出城在城外十餘里地方駐劄等語與昨日德成

所奏大畧相同似無虛假柴大紀種種劣蹟德成在浙省尚有風聞而任承恩于四十九年到提督任時亦已聞其聲名狼籍廢弛營伍可見人言籍籍已非一日乃福康安李侍堯含糊徇隱即治罪亦所應得今經朕嚴行訓飭福康安李侍堯務將德成指出柴大紀各款及任承恩所供各情節並此外尚有何劣蹟一併據實查叅候朕裁酌朕于福康安李侍堯恩眷素優今因此事竟不免煩勞朕心為朕所憎然朕

之憎伊二人亦有輕重福康安雖未將柴大紀實在  
款蹟指出叅劾但究已具摺陳奏且福康安甫到臺  
灣為時未久或未能訪查確實又正值剿捕賊匪之  
際無暇詳悉聲倣尚可原諒然已屬非是至李侍堯調  
往閩浙總督已及一年柴大紀種種劣蹟久已物議  
沸騰傳播鄰省即任承恩前在陸路提督任內臺灣  
非其所轄亦早有所聞而李侍堯並無一字奏及朕之  
待李侍堯恩施格外乃伊如此瞻徇欺隱實屬昧良

負恩無福承受優眷此事雖徐嗣曾亦係該省巡撫  
未經具奏但伊係漢人平日信任亦非李侍堯可比  
而李侍堯尚然如此朕亦難怪徐嗣曾之不奏矣著  
李侍堯即將因何並不據實叅奏有心徇隱之處明  
白廻奏

欽定平定臺灣紀畧卷四十八